



Jumat, 18 Oktober 2024

Ogen: Matius 20:21



Mindo Man Jesus



Nande nge maka nande, kai pe ilakoken, iperjuangkenna gelah sikap anak-anakna i bas masa depan. Kurang-kurang pe ipanna nakan e, iurakina pe tektek ikan e, ntahtakal ras ikurna man bana gelah sikap dengen besur anak-anak e. Luar biasa usahana ndukung anak-anakna. Lit sekalak nande si ngarak-ngarak anakna guna ikut i bas seleksi akpol, masuk perguruan tinggi, ia sikurang tunduh, ia ikut kiam, latihan fisik ras soal ngarak-ngarak anak-anakna. I bas sada dampar banci si apresiasi tapi i bas dampar sideban banci erbahan anak-anak e lanai mandiri erkiteken terlalu iarak-arak ras ifasilitasasi.

Bage me si ituriken i bas ogenta enda sekalak nande si ersura-sura anak-anakna ndatken posisi si sikap selaku ajar-ajar Jesus i bas masa depan. Reh ia ndahi Jesus, teridah percakapenna, isungkun Jesus kai atena. I je iturikenna ukurna kerna anak-anakna, i ja kenca Jesus pepagi jadi raja, sada arah kemuhendingen sada arah kawesna. Posisi enda duana e me posisi si terpenting, arapenna anakna e sikap masa depanna.

Perlu kal kita man Jesus kerna kerina kecibal geluhta, mindo kerna kegeluhen jabunta, anak-anakta. I bas paksa genduari enda, kita mindo arah pertotonta. Ula kal si pindo man kalak si deban ntaht ngandalken gegehta, beluhta ras usahanta. Janah Jesus pasti nungkun, kai atendu? Situriken man Jesus isi pusuhanta, sura-sura, arapenta, perbeben, aru ate ras kerinana. Situngtungken man Jesus, kataken man Jesus dimelungen kam, sampati ras aloina kita. Si perjuangkan, arak arak pertumbuhan anakta rikut masa depanna dengen sitotoken.